

दिनांक 22.06.2024

समय: 18.45 बजे

आकाशवाणी जयपुर—अजमेर

प्रादेशिक समाचार

- केंद्रीय वित्त मंत्री निर्मला सीथारमण री सदरत मांय आज नई दिल्ली मांय राख्यी ज्यी बजट ऊं पैली री चर्चा मांय राज्य री उपमुख्यमंत्री अर वित्त मंत्री दिया कुमारी प्रदेश रा विकास ऊं जुड्या मुद्दा केंद्रीय वित्त मंत्री सामी रख्या ।
- मुख्यमंत्री भजनलाल शर्मा कह्यो—राज्य सरकार महिलावां ने आगे बधावण सारु पूरा मन ऊं काम कर रही है ।
- प्रदेश मांय 'विश्व ऊँट दिवस' रा सिलसिला मांय न्यारा—न्यारा कार्यक्रम राख्यी ज्या ।
- राज्य मांय चौमासा ऊं पैली री बिरखा रो दौर जारी—घणखर ठौड़ां पारो उतर्यो ।

0000

केंद्रीय वित्त मंत्री निर्मला सीथारमण री सदरत मांय आज नई दिल्ली मांय राख्यी ज्यी बजट ऊं पैली री चर्चा मांय प्रदेश री वित्त मंत्री अर उपमुख्यमंत्री दिया कुमारी ई सिरकत कीनी । मीटिंग मांय दिया कुमारी राजस्थान ऊं जुड्या विकास रा मुद्दा केंद्रीय वित्त मंत्री सामी रख्या । ई दौरान दिया कुमारी 'पूर्वी राजस्थान कैनाल परियोजना' ऊं जुड़ी जाणकारी विगतवार मंत्री सामी रख्यी । ई सागे ई राज्य री वित्त मंत्री प्रदेश मांय 'जल जीवन मिशन' रा काम री प्रगति अर इण रा तैत राज्य सरकार री कोशिशं रो जिक करता थकां केंद्र सरकार ऊं बत्ती माली मदद री मांग कीनी । दिया कुमारी सीथारमण सामी प्रदेश री 3 खास रेल परियोजनावां रा काम ऊं जुड्यो मुद्दो ई रख्यो । वे राज्य मांय नुवा नेशनल हाईवे बणावण रा बारा मांय ई वित्त मंत्री सागे चर्चा कीनी ।

0000

मुख्यमंत्री भजनलाल शर्मा कह्यो है के महिलावां ने मजबूत बणावण सारू वां ने बराबरी रा हक अर मौका मिलणा जरूरी है। वे राज्य मांय थर्ड ग्रेड शिक्षक भर्ती मांय महिलावां सारू 50 फीसदी आरक्षण करण रा फैसला माथे आज जयपुर मांय वां रा रहवास माथे महिलावां कानी ऊं राख्थी ज्या अभिनन्दन अर आभार समारोह मांय बोल रह्या हा। कार्यक्रम मांय मुख्यमंत्री कह्यो के आधी आबादी रा योगदान बगैर देश अर प्रदेश मजबूत नी बण सके है ई कारण राज्य सरकार महिलावां ने आगे बधावण सारू पूरा मन ऊं काम कर रही है।

मुख्यमंत्री कह्यो के राज्य सरकार बेटियां सागे नौजवानां ने ई आगे बधबा रा पूरा मौका देवेला। वे कह्यो के आवता दिनां राज्य रा न्यारा-न्यारा सरकारी महकमां मांय रीता ओहदां माथे भर्ती सारू परीक्षावां करायी जावेला। मुख्यमंत्री कह्यो के राज्य मांय लागण वाळा कारखानां ऊं ई नौजवानां ने नौकरी धंधा रा खूब मौका मिलेला।

000

विधि मंत्रालय मांय स्वतंत्र प्रभार वाळा राज्यमंत्री अर्जुनराम मेघवाल कह्यो है के एक जुलाई ऊं लागू व्हेवण वाळा तीन नुवा आपराधिक कानूनां ऊं देश री न्याय व्यवस्था मांय बदलाव आवेला। वे आज जयपुर मांय खबरनवीसा सागे बातचीत कर रह्या हा। मेघवाल कह्यो के अ कानून लागू करण सारू अहलकारां अर कर्मचारियां ने सिखावण दी जा रही है। वे कह्यो के अ कानून लागू व्हेवण ऊं जनता ने केई सुबीता मिलेला।

000

आकाशवाणी समाचार जयपुर री ओर ऊं प्रादेशिक समाचार बुलेटिनां मांय तीन नुवा आपराधिक कानूनां रा बारा मांय जाग जगावण सारू श्रृंखला चलायी जा रही है। आज पेश है भारतीय नागरिक सुरक्षा संहिता मांय गवाहां रा संरक्षण रा बारा मांय खास प्रावधान री जाणकारी—

भारतीय नागरिक सुरक्षा संहिता री धारा 398 रा तहत गवाह संरक्षण योजना ने कानूनी रुप दियो ज्यो है। इण ऊं पीड़ित या गवाह ने सुरक्षित माहौल मांय काम करण मांय मदद मिलेला अर वे अर, धमकी या किण ई भांत रा गैर-वाजिब फायदा रा लालच बगैर कानूनी कार्यवाही मांय हिस्सो ले सकेला।

000

प्रतियोगी परीक्षावां मांय गडबडियां रोकण रा मकसद ऊं केंद्र सरकार कानी ऊं बणायी ज्यो **सार्वजनिक परीक्षा अनुचित साधनों की रोकथाम कानून, 2024** आज लागू व्हे ग्यो। ई रा तहत प्रतियोगी परीक्षा मांय धोखाधड़ी करण रा दोषियां सारू तीन ऊं पांच साल ताई कैद री सजा रो प्रावधान करी ज्यो है। दगाबाजी रा संगठित अपराधां मांय शामिल अपराधियां ने पांच ऊं दस साल ताई री कैद अर कम ऊं कम 1 करोड़ रुपया रा जुर्माना री सजा रो प्रावधान करी ज्यो है। ध्यानजोग है के लोकसभा छः फरवरी ने अर राज्यसभा नौ फरवरी ने इण ने मंजूरी दे दीनी ही। राष्ट्रपति द्रौपदी मुर्मू री मंजूरी पाछे ओ कानून बण ग्यो।

संघ लोक सेवा आयोग, कर्मचारी चयन आयोग, राष्ट्रीय परीक्षा एजेंसी-एनटीए, रेलवे भर्ती बोर्ड, बैंकिंग भर्ती परीक्षा निकायां अर दूजी सार्वजनिक परीक्षावां मांय अनुचित साधन काम लेवण ने रोकण सारू ओ कानून बणायी ज्यो है।

000

25 ऊं 27 जून बीचे व्हेवण वाळी यूजीसी-नेट जून 2024 परीक्षा टाळ दीरीजी है। नेशनल टेस्टिंग एजेंसी-एनटीए रे मुजब परीक्षा रा नुवा कार्यक्रम रो ऐलाण इण री आधिकारिक वेबसाइट माथे कर्यो जावेला। उम्मीदवार एनटीए रा हेल्प डेस्क नम्बर 011-40759000 अर 011-69227700 माथे फोन कर र या ई-मेल पता माथे मेल कर र जाणकारी ले सके है।

000

बीकानेर रा राष्ट्रीय उष्ट्र अनुसंधान केन्द्र री ओर ऊं 'विश्व ऊंट दिवस' रा सिलसिला मांय आज ऊंटों री दौड अर वां सजावण री होडों समेत न्यारा-न्यारा कार्यक्रम राख्यी ज्यो। ई मौके एक परिचर्चा राख्यी ज्यो अर प्रदर्शनी लगायी ज्यो। ई पाछे ऊंट पाळबा वाळां ने ऊंटों रा रख-रखाव रा बारा मांय जाणकारी दीरीजी। ऊंट दिवस रा सिलसिला मांय अलवर मांय राइका गौरव दिवस मणायी ज्यो। ई मौके केन्द्रीय वन मंत्री भूपेन्द्र यादव अर राज्य रा वन मंत्री संजय शर्मा रैली ने हरी झंडी बता र रवाना कीनी। पाली मांय ई ऊंट दिवस रे मौके आज वीर हडमल राईका समाज कानी ऊं शोभायात्रा निकाळी ज्यो अर ऊंटों ने बचावण रा बारा मांय संगोष्ठी राख्यी ज्यो। जैसलमेर जिला रा अचला गांव मांय ई ऊंट दिवस मणायी ज्यो।

000

प्रदेश मांय चौमासा ऊं पैली री बिरखा व्हे रही है। आज ई केई जिलां मांय आंधी चाली अर तेज बायरा सागे बिरखा व्ही। जैसलमेर, बाड़मेर, जोधपुर, उदयपुर, भरतपुर, धौलपुर, जालौर, सिरोही, नागौर अर बीकानेर जिलां मांय कठे-कठे तेज हवा चालण सागे हल्की बिरखा रा समाचार है। लारला दो-तीन दिन ऊं व्हे रही बिरखा ऊं घणखर ठौडों दिन अर रात री बगत पारो उतर्यो है। दिन मांय तापमान 40 डिग्री सेल्सियस ऊं नीचे उतर ग्यो है। मौसम विभाग रे मुजब आज बीकानेर, जोधपुर, जयपुर, उदयपुर, अजमेर अर कोटा संभाग रा कुछ हलकां मांय आज ई बिरखा व्हेवण रा आसार है।

मौसम केंद्र जयपुर रे मुजब उदयपुर, कोटा, जोधपुर अर अजमेर संभाग रा कुछ हलकां मांय आवता 3-4 दिन बादळां री गाज सागे बारिश व्हेवण री संभावना है। बीकानेर, जयपुर अर भरतपुर संभाग रा कुछ हलकां मांय आवता दो-तीन दिन बारिश ऊं जुड़ी हलचल मांय कमी व्हेवण अर पारो 2 ऊं 4 डिग्री सेल्सियस ताई चढबा रा आसार है।

000

विधानसभा अध्यक्ष वासुदेव देवनानी आज अजमेर रा जवाहरलाल नेहरू अस्पताल रो दौरा कीनो। वे अस्पताल मांय मुहैया कराया जावण वाळा जांच रा न्यारा-न्यारा सुबीता अर मशीना रा बारा मांय जाणकारी लीनी।

000

भरतपुर रा जिला कलेक्टर डॉ. अमित यादव अहलकारां री मीटिंग ले र गैर कानूनी खुदाई रे खिलाफ अभियान चलावण रा हुकम दीना है। वे गैर-कानूनी खुदाई री शंका वाळा

हलकां मांय तारबंदी करण सागे हिफाजती इन्तजामात चाक चौबंद राखण समेत न्यारा-न्यारा हुकम दीना। बाड़मेर रा ज़िला कलेक्टर निशांत जैन ई ग्राम पंचायत जसाई रा प्राथमिक स्वास्थ्य केन्द्र, आयुर्वेद अस्पताल, ढांढां रा अस्पताल अर राशन री दुकान अर ग्राम पंचायत मारुड़ी रा प्राथमिक स्वास्थ्य केन्द्र रो दौरा कर र हालात रो जायजो लीनो। हनुमानगढ़ रा ज़िला कलेक्टर काना राम भादरा हलका री ग्राम पंचायत झॉसल मांय जिला स्तर रा अहलकारां सागे रात्रि चौपाल मांय जनता री समस्यावां सुणी।

000

बून्दी मांय कृषि विज्ञान केन्द्र श्योपुरिया बावड़ी परां प्राकृतिक खेती रा बारा मांय जाणकारी देवण रो कार्यक्रम राखी ज्यो, जिण मांय ज़िला रा महिला किसानां समेत 36 प्रगतिशील किसान सिरकत कीनी। कार्यक्रम मांय प्राकृतिक अर जैविक खेती मांय अन्तर, प्राकृतिक खेती रो महत्त्व अर हरी खाद काम लेवण रा तरीकां रा बारा मांय जाणकारी दीरीजी।

000